

Sikeigna Na Letasi Nigna Pita

Na Titiono Eigna Na Letasi Iaani

A Pita sina mane vaovarongo nigna a Jisas. Leghugna a Jisas ke vula hadi i popo, a Pita na mane vetula mi sikei tadia mara kena baubatu tadia na komi tinoni kiloau i Jerusalem. Reghia kori buka Tango 15:7-11.

A Pita ke risoa na letasi iaani vanira na komi tinoni kena vaututuni kena mono tadia kekeha provins kena vunaghi pungusira mara Rom. Tadia na komi provins irangeni, mara kena boi vaututunia Jisas kena bosu magnahaghinira na komi tinoni kiloau mena vaparara.

Pita ke risoa na letasi iaani bali vaheta na ghaghanadia na komi tinoni kiloau eigna kedana sokara ngasi kori vido kena papara kori havidia. Na vunegna kena adoa a Krai ke papara kori havigna, e toke gi imarea kedana sasaa na papara mua eigna kena vaututunia. Pita ke velera na komi papara ke padara bali pipilia nidia na vaututuni. Gi kedana sokara ngasi me ghieghilei jufu kori vagovugna, a God keda hera na komi fata ke toke ke kaikaliti vanira nigna na komi tinoni.

Kori letasi iaani a Pita ke velera mua na komi tinoni kiloau eigna kedana leghua hahalia na komi puhi ke jino ke nabadia na komi tinoni nigna a Jisas Krai.

Na komi fata ke nagho kori letasi iaani:

Na komi fata ke toke ke kaikalitia a God vanira nigna na komi tinoni (1:1-12)

Na komi tinoni kena vaututuni kedana mono tabu (1:13-2:10)

Na komi puhi kedana leghua na komi tinoni kena vaututuni, toke kedana papara kori havidia (2:11-4:19)

Na velepuhi eidia arahai kena baubatu tadia na komi tinoni kiloau (5:1-14)

¹ Inau a Pita, nigna na mane vetula a Jisas Krai, ku risoa atu itamiu ighamu a God ke vahighamu koti mono ivei mi vei tadia na komi provins i Pontus, Galesia, Kapadosia, Esia mi Bitinia. Na komi meleha irangeni boi na pukuni melehamiu. ² Leghuagna nigna na toatogha ke mono itagna i hau, God a Mama ke vahighamu eigna kotida nigna na komi tinoni. Ma na Tarunga ke Tabu ke agutu kori havimiu eigna kotida mono tabu. A God ke vahighamu eigna kotida leghua a Jisas Krai, ma na ghaugh-abuagna imanea ke vararahaghamu kori koakoa. Inau ku tarai gi a God keda vatokeghamu me heghamu hahali na soleana kori havimiu.

Ighita Katida Pitua Na Komi Fata Ke Kaikalitia Vanighita A God

³ Ati veletokea nigna na God ma a Tamagna nida a Lod Jisas Krai. Na vunegna nigna na rarovi vanighita ke hutu puala, imanea ke heghita na havi mathangani. Mi keagaieni ighita kati adoa a God keda eia vanighita na komi fata ke toke. A God ke heghita na havi mathangani iaani eigna a Jisas Krai ke havi tabiru kori thehe.

⁴ Ikeagaieni ighita kati pitua na komi fata ke toke a God ke kaikaliti vanira nigna na komi tinoni. Imanea ke kalitira na komi fata iraani i popo, tagna keda boi boto ba dika, keana keda talu mono thovohaliu. ⁵ Na vunegna ighamu koti vaututunia a God, imanea keda sokara peoghamu kori nigna na mana me ghieghilei jufu mai na vagougovui maghavu. Kori vido iangeni imanea keda vahavighamu. ⁶ Ighamu koti totogo hutu puala eigna na komi fata irangeni. Toke kotida dikahehe sina ghathi vido iso eigna na komi thagi papara ke padaghamu ikeagaieni, ighamu koti totogo eigna na komi fata ke toke a God ke eia vanighamu. ⁷ Na komi papara iraani kena padaghamu bali tateli aua nimiu na vaututuni ke pukuni tutuni ba teo. Nimiu na vaututuni ke vaghagna na gol kena pughulia kori joto bali hati aua na komi fata ke dika itagna.* Ma nimiu na vaututuni ke nagho vano tagna na gol ke boi mono thovohaliu. Gi keda talu heta nimiu na vaututuni leghugna ke govu na komi papara, a God keda veletokeghamu me ghaghana boheghamu tagna na maghavu a Jisas Krai keda tabiru mai.

⁸ Ighamu koti boi reghia a Jisas i hau moti boi reghia ikeagaieni. Keana ighamu koti dothovia moti vaututunia imanea. Ma na vunegna koti vaututunia, ighamu koti totogo hutu puala moti

* **1:7** Imarea kena kukia na gol kori joto, mi kori vido na gol ke bea na komi garu itagna kena tatave mena hati aua eigna na pukuni gol vamua keda mono. Vaghagna iangeni, na komi papara ke padaghita ke hatheghita na auagna na komi fata ke dika kori havida eigna keda pukuni heta nida na vaututuni.

hahi nimiu na veleagna sa fata ke nabagna na totogo iangeni. ⁹ Na tabamiu eigna koti vaututunia a Jisas Kraiss, na vahavighamugna ke eia a God.

¹⁰⁻¹¹ I hau, mara na profet kena kidi titionoa ghohi a God keda vatokeghamu kori nigina na dotho me vahavighamu. Na Tarunga ke Tabu nigina a Kraiss ke mono ikoradia mara na profet, me tatelia vanira a Kraiss keda kidi papara gi a God keda abe hadia. Imarea kena hiohiroa puala tadia na komi Rioriso ke Tabu eigna kena magnahaghinia kedana adoa na maghavu ma na puhi keda tate mai na komi fata iraani. ¹² Na Tarunga ke Tabu ke tateli vanira na komi profet na komi titiono kena eia eigna a Kraiss, boi bali hathera ghehedia, keana bali hatheghamu. Mi ikeagaieni ighamu koti rongovia ghohi na komi titiono iraani tadia arahai kena titiono vanighamu na Rorongon ke Toke. Imarea kena titionoa kori nigina na mana na Tarunga ke Tabu a God ke vetula horu maia i popo. Na vunegna na komi fata a God ke eia bali vahavighita ke toke puala, na komi enjel huju kena magnahaghinia puala mua kedana thaothadoghagna.

God Ke Magnahaghinighita Katida Mono Tabu

¹³ Na vunegna a God ke eia vanighamu na komi fata ke toke irangeni, oti mono kaikaliti kori ghaghanamiu eigna kotida agutu vania. Moti reireghighamu ghehemiu tagna na koakoa. Oti vaututunia hahalia a God keda heghamu na komi fata ke toke kori vido a Jisas Kraiss keda tabiru mai. ¹⁴ Na vunegna ighamu ara dathegna a God moti leghua, oti saghoi eia na komi puhi ke dika

koti magnahaghinia na eiagna kori vido koti boi adoa mua a God. ¹⁵ Keana ikeagaieni, na havimiu keda pukuni tabu, eigna a God ke vahighamu ke tabu. ¹⁶ A God ke velea tadia na komi Rioriso ke Tabu, “Oti mono tabu eigna inau ku tabu.”

¹⁷ A God koti kiloagna a Tamamiu kori vido koti tarai, imanea ke boi thevu tagna ahai kori vido ke fatera na komi tinoni eigna na komi fata kena eia. Na vunegna iangeni, oti ghaghana bohea a God kori vido koti mono tadia na komi meleha ke boi na pukuni melehamiu. ¹⁸ Oti ghaghana bohea a God eigna ighamu koti adoa imanea ke volighamu au eigna kotida mamaluha tagna na komi puhi ke boi tangomana na hatheghamugna. Ighamu koti pipilia tadia ara hutumiu na komi puhi ke dika irangeni. God ke boi volighamu au tagna sa fata keda govu vaghagna na silva ba na gol. Teo. ¹⁹ Imanea ke volighamu au tagna na fata ke nagho vano, na pukuni ghaughabuagna a Krai. A Krai ke vaghagna sina dathei sip kena havughaghia ke teo sa fata ke dika itagna. ²⁰ Gi e vavuha a God na maramagna, imanea ke kidi vahia ghohi a Krai eigna keda vamamaluhaghamu kori koakoa. A God ke boi vetula maia a Krai i hau, keana tadia na komi dani iraani gi e govu na maramagna, a God ke vetula maia imanea eimiu ghamu. ²¹ Ighamu koti voututunia a God eigna na hava ke eia a Krai. Ma na vunegna a God ke vahavi tabirua imanea kori thehe me vathaba, ighamu koti voututunia a God moti voututunia imanea keda heghamu na komi fata ke toke ke taluhaghorea vanighamu.

²² Ighamu koti vararaha na havimiu kori vido

koti vaututunia na velepuhi ke tutuni eigna a Jisas Kraiss, ma na vunegna iangeni ighamu koti turughu na dothoviragna ara kulamiu kiloau. Mi inau ku magnahaghinighamu kotida veidothovighi hahali kori hetamiu doudolu. ²³ Oti veidothovighi eigna God ke heghamu na havi mathangani. Na havimiu ke mathangani ke boi mai tadia ara idomiu mara tamamiu kedana thehe, keana tagna na haghoregna a God. Ma na haghoregna a God keda mono thovohaliu me mono nigna na mana bali vamathangania na havimiu. ²⁴ Na komi Rioriso ke Tabu kena velea,

“Na komi tinoni kena vaghagna na buburu,
ma na dodorodia ke toke ke vaghagna na komi
falaoa.

Na buburu ke gho'e ma na komi falaoa kena sikili
horu,

²⁵ kari na haghoregna a Lod ke mono thovo-
haliu.”

Ma na haghore iangeni, na Rorongu ke Toke kena
titionoa ghohi itamiu.

2

A Kraiss Na Naghoi Ghahira

¹ Na vunegna a God ke heghamu na havi mathangani, oti saghoi leghua na toatogha bali vadiadikalara arahai tavogha. Saghoi piapilau ba eia vaghagna ighamu koti jino eigna kedana veletokeghamu vamua na komi tinoni. Moti saghoi tahotha ba vuhahaghore eigna sa tinoni.

² Oti vaghagna na komi meomeo kena eu havi

kena rofo mena haga susuu ghadia. Oti rofo eigna na haghoregna a God eigna nimiu na vaututuni keda heta ma God keda vahavighamu. ³ Oti eia vaghagna iaani eigna koti reghia ghohi kori havimiu a Lod ke eia na komi fata ke toke vanighamu.

⁴ Oti mai tagna a Lod Jisas Kraiss ke heghita na havi mathangani. Imanea ke vaghagna na naghoi ghahira kori hidigna na vathe. Na ghahira iangeni, na komi tinoni kena bos mag-nahaghinia, kari a God ke vahia me toatogha ke nagho vano. ⁵ Ighamu koti hatia na havi mathangani, koti vaghagna na komi ghahira a God ke hatia bali agutua nigina na vathe. Na vathe iangeni hiri, ighamu koti leghua a God. Na Tarunga ke Tabu ke agutua na vathe iangeni itamiu. Ighamu koti hatia na havi mathangani, a God ke eighamu eigna kotida nigina na boo pris bali agutu vania. Ma na vunegna na hava ke eia a Jisas Kraiss, imanea keda totogo eidia na komi fata koti eia vania. ⁶ Iaani ke vaghagna na hava a God ke velea ke mono tadia na komi Rioriso ke Tabu,

“I Jerusalem, inau ku tutua sina ghahira kori hidigna na vathe.

Inau ku vahia na ghahira iangeni eigna keda na naghoi ghahira.

Ahai ke vaututunia,

teo keda dikahehe ke boa nigina na vaututuni itagna.”

⁷ Tamiu ighamu koti vaututunia, a God ke ghaghana boheghamu. Keana na fata ke dika keda padara arahai kena boi vaututunia, eigna

‘Na ghahira kena boi magnahaghinia mara kena agutu vathe,
ikeagaieni na ghahira iaani na naghoi ghahira tadia na komi ghahira kori hidigna na vathe.’

⁸ Na komi Rioriso ke Tabu kena velea mua,

“Iaani na ghahira ke vapejuraghira na komi tinoni ke sethe eigna kedana sikili.”

Imarea kena sikili eigna kena boi leghua na haghoregna a God. Na sikili kena eia ke leghua nigna na toatogha a God eidia.

⁹ Keana ighamu na booi tinoni ke vahighamu a God. Ighamu na komi pris bali agutu vania a God na King. Ighamu na komi tinoni ke tabu nigna imanea ghehegna. Ma God ke vahighamu eigna kotida titiono aua itadia na komi tinoni na komi fata ke toke ke eia. Imanea ke kiloghamu au kori puni me hatighamu kori nigna na raraha ke toke puala. ¹⁰ I hau, ighamu boi na nigna na tinoni a God, kari ikeagaieni ighamu na nigna imanea. I hau a God ke boi rarovighamu, kari ikeagaieni imanea ke rarovighamu.

Na Puhi Ke Nabadia Na Komi Tinoni Agutu Nigna A God

¹¹ Ara kulagu kiloau ku dothovighamu, na vunegna ighamu koti mono tadia na komi

meleha kena boi pukuni melehamiu, inau ku haghore heta vanighamu eigna kotida saghoi leghua nimiu na komi vanohehe ke dika ke rihu pungusighamu. ¹² Ighamu koti mono duadia na komi tinoni bongihehe, mi kekeha maghavu imarea kena toroghamu mena velea ighamu koti eia na komi puhi ke dika. Oti leghua hahalia na puhi ke jino eigna kedana reghia na komi fata ke toke koti eia. Gi kotida eia iangeni, imarea kedana veletokea a God kori maghavu imanea keda mai itadia.

¹³ A Lod ke magnahaghinighamu kotida leghua na haghoredia arahai kena vunaghi pungusighamu kori maramagna, haluhadi na King gna i Rom* eigna imanea ke vunaghi pungusira na komi tinoni gougovu. ¹⁴ Moti leghua mua na haghoredia na komi primia eigna na king ke vahira bali vaparara arahai kena eia na komi fata ke dika mena kilothabara arahai kena leghua na puhi ke jino. ¹⁵ God ke magnahaghinighamu kotida eia na komi fata ke toke eigna na komi tinoni hahi kedana soto na haghore diadikalaghamugna. ¹⁶ Na vunegna ighamu koti vaututunia a Krais, ighamu koti mamaluha tagna na papara ke nabamiu eigna na komi paluhamiu. Kari oti saghoi toatogha gi e toke vamua kotida eia na komi fata ke dika eigna ighamu koti mamaluha. Keana oti leghua na puhi ke nabagna na komi tinoni agutu nigna a God. ¹⁷ Oti ghaghana bohera na komi tinoni gougovu moti dothovira ara kulamiu kiloau. Ghaghana bohea

* **2:13** “King gna i Rom” Reghia kori Diksonari

a God moti ghaghana bohea mua na King gna i Rom.

Leghua Na Puhigna A Krai Kori Papara

¹⁸ Ighamu na komi tinoni seka,† oti leghua na haghoredia na koi vunaghimiu moti ghaghana bohera hahali. Kekeha vunaghimiu ke toke mena eia vanighamu na komi puhi ke toke. Keana kekeha kena eia na hava ke dika itamiu. Oti leghura gougovu vamua. ¹⁹ Kekeha maghavu na koi vunaghimiu, toke kotida boi eia sa fata ke dika, imarea kena vaparaghamu. Gi kotida ghathapaku eigna koti togha hahalia a God kori vido kena vaparaghamu, a God keda totogo eimiu. ²⁰ Keana, gi kotida ghathapaku kori vido kena thabuhighamu eigna na fata ke dika koti eia, a God keda boi totogo eimiu. A God keda totogo vamua gi kotida ghathapaku kori vido kena vaparaghamu eigna na fata ke toke koti eia. ²¹ God ke kiloghamu eigna kotida papara vaghagna iangeni eigna a Krai ke papara eimiu ighamu me tateli vanighamu na puhi kotida leghua. ²² A Krai ke boi eia sa koakoa me teo sa piapilau ke au mai kori livogna. ²³ Kori vido imarea kena titono diadikala a Jisas, imanea ke boi haghore tughura tagna sa haghore ke dika. Kori vido imarea kena vapara, imanea ke boi velea keda raghe leghura. Teo. Imanea ke lubatia a God eigna keda reireghia, eigna a God ke fatera na komi tinoni kori puhi ke jino hahali. ²⁴ Kori vido a Krai ke thehe kori ghaibabala, imanea ke hatia na komi paluhada

† **2:18** Reghia “tinoni seka” kori Diksonari.

kori tonogna eigna ighita katida taveti sania na koakoa mati mono hahali kori puhi ke jino. Na komi ngeso kori tonogna imanea ke vajinoghamu kori matagna a God. ²⁵ I hau, ighamu koti vaghagna na komi sip ke jefe kori hangana, kari ikeagaieni ighamu koti tabiru mai tagna ahai ke reireghighamu me kalitighamu.

3

Na Velepuhi Eidia Na Komi Tinoni Taulaghi

¹ Ighamu na koi vaivine koti taulaghi, oti leghua na haghoredia ara taumiu. Gi kekeha ara taumiu kedana boi vaututunia na haghoregna a God, imarea da ena magnahaghinia na vaututuni kori vido kena reghia na puhimiu ke toke. E toke vamua kotida boi titiono itadia eigna a Krai, ² eigna imarea kedana reghi leghua na puhimiu ke jino mena reghia mua ighamu koti ghaghana bohea a God. ³ Boi na fata ke nagho na eiagna na komi fata bali vatoetokelaghagna na dodoromiu, vaghagna na pijiriagna na sesehumiu, ba na vahagheagna na komi fata bali gnignilau kena agutua kori gol, ba na pipisiagna na komi pohe ke vahotha. ⁴ Na fata ke nagho keda vatoetokelaghagna na dodoromiu, na hava keda au mai kori havimiu. Na mono taluleghu ma na mono bughoro, e rua na fata ke ulaghagna thovohaliu ma God ke toatogha ke nagho vano. ⁵ I hau na koi vaivine kena maimanihihia a God mena vaututunia imanea keda eia na hava ke taluhaghorea, iira kena vatoetokelaghagna na dodorodia kori puhi iangeni. Iira kena leghua na haghoredia ara taudia. ⁶ A Sera sikei itadia. Iia

ke leghua na haghoregna a Ebrahim me kiloa a vunaghigna. Ighamu ara dathegna a Sera kori vido koti eia na komi fata ke jino moti boi mataghu.

⁷ Ighamu na komi mane taulaghi, na vunegna ara taumiu kena boi heta vaghagna ighamu, oti toatogha hahalia na hava ke toke kotida eia vanira. Oti ghaghana bohera eigna iira kedana hatia duamiu ghamu na havi ke teo na govugna a God ke hera nigna na komi tinoni. Gi kotida boi eia iaani, a God keda boi rongovia nimiu na tarai.

Na Velepuih Eidia Na Komi Tinoni Kiloau

⁸ Iaani nigua na vagovui velepuhi itamiu. Inau ku magnahaghinighamu kotida sikei na ghaghanamiu moti veirarovighi. Oti veidothovighi vaghagna koti tamatahi, moti veihatheghi kori hehei dotho moti mono taluleghu.

⁹ Saghoi eia na dika vania ahai ke eia na dika itamiu, moti saghoi haghore diadikala ahai ke haghore diadikalaghamu. Keana oti kaea a God eigna keda vatokera. God ke magnahaghinighamu kotida eia iangeni, mi manea ke taluhaghorea keda vatokeghamu gi kotida eia.

¹⁰ Vaghagna na komi Rioriso ke Tabu kena velea,

“Gi kotida magnahaghinia na mono totogo kori havimiu,
oti saghoi titionoa na komi haghore ke dika moti saghoi piapilau.

¹¹ Taveti sania na komi puhi ke dika moti eia na komi puhi ke toke.

Oti agutu heta eigna kotida mono haidu toetoke duadia na komi tinoni.

¹² Oti eia na komi fata iraani eigna a Lod ke reireghi toetokera arahai kena kena mono jino me rongovia nidia na tarai.

Keana a Lod ke sokara pungusira arahai kena eia na komi fata ke dika.”

Ighita Katida Sasaa Na Papara Kori Vido Kati Eia Na Hava Ke Toke

¹³ Gi kotida agutu heta bali eia na komi fata ke toke, da teo ahai keda vaparaghamu. ¹⁴ Keana, gi kedana vaparaghamu eigna ighamu koti eia na komi fata ke jino, a God keda vatokeghamu. Oti saghoi mataghunira arahai kena vaparaghamu moti saghoi lubatia na ghaghanamiu keda horuhaijadi. ¹⁵ Keana oti ghaghana bohea a Krai moti lubatia eigna keda vuanaghi pungusia na havimiu. Oti mono kaikaliti hahali bali haghore tughura arahai kedana huatighamu eigna na vunegna koti vaututunia a Krai. ¹⁶ Moti mono taluleghu moti ghaghana bohera kori vido koti haghore tughura. Oti leghua hahalia na puhi koti adoa ke jino. Gi kotida eia iangeni, arahai kena velea na komi fata ke dika eigna na puhimiu ke toke, imarea kedana maomamo nidia. ¹⁷ Gi a God keda lubatighamu eigna kotida papara eigna na fata ke toke koti eia, a God keda totogo eimiu. Keana gi kotida papara eigna koti eia na fata ke dika, a God teo keda totogo eimiu.

¹⁸ A Krai huju ke papara kori vido ke thehe eigna na komi paluhada. Imanea ke sikei vamua na theheagna me teo keda ghoi thehe eigna mua na komi paluhada. Imanea ke teo sa

paluhagna kari imanea ke thehe eida ighita na komi tinoni koakoa bali hatighita atu tagna God. Imarea kena vathehea na tonogna a Kraiss, keana na Tarunga ke Tabu ke vahavi tabirua. ¹⁹ Mi kori nigina na mana na Tarunga ke Tabu, a Kraiss ke vano me titiono tadia na komi tarunga kena mono kori meleha papara. ²⁰ Na komi tarunga iangeni, na komi tarungadia arahai kena huhughua a God kori vido a Noa ke agutua na vaka. Kori vido iangeni a God ke boi saisami na vapararagna eigna ke magnahaghinia kedana tughua na havidia ke dika. E alu vamua na tinoni kena hahaghe kori vaka kena boi bilomo eigna na vaka ke tatave kori bea. ²¹ Ma na bea iangeni, na totoghalegna na vahavighamugna a God ke eia vanighamu tagna na siuvitabu. Na pukuni siuvitabu, boi na lumiagna na garu kori tonono. Teo. Na pukuni siuvitabu, na kaekae kati eia tagna God gi keda talutavogha na paluhada me vararaha na havidia. Na siuvitabu iaani ke tangomana na vahavighitagna eigna a Jisas Kraiss ke sokara tabiru kori thehe. ²² A Jisas ke hadi i popo mi keagaieni ke nohe kori madothogna a God, na vido ke nagho vano. Ingengeni imanea ke vunaghi pungusira na komi enjel ma na komi tidatho ma na komi tarunga gougovu.

4

Na Puhi Ke Nabadia Aarahai Kena Vaututuni

¹ Ighamu koti adoa ghohi a Kraiss ke papara kori vido ke thehe kori ghaibabala. Na vunegna imanea ke sasaa na papara, ighamu ghua kotida sasaa na papara. Eigna ahai ke papara ke bosu

magnahaghinia na koakoa keda talu vunaghi pungusia na havigna. ² Imanea ke taveti sania na koakoa eigna keda boi leghua mua nigna na komi vanohehe ke dika kori vido ke talu havi mua kori maramagna. Keana imanea keda leghua vamua nigna na vanohehe a God. ³ Kori vido koti boi voututunia mua a Krai, ighamu koti eia na komi puhi ke dika kena eia na komi tinoni bongihehe. Kori vido iangeni, ighamu koti nere duadia arahai kena boi ara taumiu, moti mamagna, moti kou memee, moti eia na komi haidu bali eia na komi puhi ke dika. Sina fata ke dika puala koti eia mua, ighamu koti maimanihira na komi ngunguju. ⁴ Keana ikeagaieni na komi tinoni bongihehe kena vere nidia itamiu eigna koti boi eia duadia na komi thagi puhi ke dika irangeni, mena haghore diadikalaghamu. ⁵ Keana oti saghoi vaovarongo itadia eigna ivughei valiha imarea kedana titiono aua tagna God na komi fata kena eia. Ma God ke kaikaliti ghohi bali fatera arahai kena havi mua ma arahai kena thehe ghohi. ⁶ Iangeni na vunegna imarea kena titiono na Rorongo ke Toke tadia arahai itamiu kena thehe ghohi. Toke na tonodia ke thehe eigna na koakoa kena eia, imarea kena rongovia na Rorongo ke Toke eigna na tarungadia kedana tangomana na havi vaghagna a God ke havi.

⁷ Na maghavu keda govu na maramagna iaani ke gharani mai ghohi. Na vunegna iangeni, oti rereghighamu ghehemiu tagna na koakoa moti mono kaikaliti hahali eigna kotida tangomana na tarai.

⁸ Na fata ke nagho vano, oti veidothovighi

kori hehemiu doudolu. Gi kotida dothovira na komi tinoni, ighamu kotida talutavogha na paluhadia kori vido kena eia na dika itamiu. ⁹ Oti kalitira ara kulamiu kiloau kori vathemiu. E boi toke kotida bosi nimiu na eiagna. ¹⁰ A God ke heghamu soasopa sonihathavu bali eia sina agutu keda hathera arahai tavogha. Moti agutu toetoke kori sonihathavu ke heghamu. ¹¹ Aarahai a God ke hera na sonihathavu bali titiono, imarea kedana titiono na komi haghore ke mai tagna a God. Ma arahai a God ke hera na sonihathavu bali hathera arahai tavogha, imarea kedana eia kori heta ke hera a God. Oti ei toetokea na agutu ke heghamu a God eigna na komi tinoni kedana veletokea a God kori vido kena reghia na komi fata koti eia ke toke eigna koti mono haidu duagna a Jisas Krai. God ke mono nigna na mana ma na ghaghana bohe ke hutu ke hau me hau. Amen.

Ighita Katida Totogo Kori Vido Katida Papara

¹² Ara kulagu, oti saghoi nia vere tadia na komi papara hutu ke padaghamu eigna na komi papara boi na fata mathangani itamiu. Na komi papara irangeni kena mai itamiu bali pipilia nimiu na vaututuni. ¹³ Oti totogo eigna ighamu koti tangomana na papara vaghagna a Krai ke papara. Oti eia iangeni eigna nimiu na totogo keda hutu vano mua kori vido a Krai keda tabiru mai kori nigna na mana ke hutu puala. ¹⁴ Kori vido na komi tinoni kena haghore diadikalaghamu eigna ighamu koti leghua a Krai, oti totogo eigna na haghore diadikalaghamugna kena eia ke tateli aua nigna na Tarunga a God ke

pukuni mana puala ke mono duamiu. ¹⁵ E boi toke gi kotida hatia na papara eigna koti thabu vathehea na tinoni, ba oti biabilau, ba oti boi leghua kekeha mua na vetula, ba oti diadikala nidia na agutu arahai tavogha. ¹⁶ Keana gi kedana vaparaghamu eigna ighamu koti leghua a Krai, oti saghoi maomamo. Oti veletokea vama a God eigna na komi tinoni kena adoa ighamu koti nigna a Krai.

¹⁷ Na maghavu a God keda fatera na komi tinoni ke jufu mai ghohi, mi manea keda kidi fatera nigna na komi tinoni. Na vunegna a God keda kidi fateghita ighita kati vaututuni, ighita kati adoa na fate imanea keda eia itadia arahai kena boi vaututunia na Rorongo ke Toke, kenughua e tahu vano tagna na fate keda eia tada. ¹⁸ Na komi Rioriso ke Tabu kena velea,

“Gi keda vahotha na vahaviragna na komi tinoni
 kena jino, na hava keda padara arahai
 kena boi leghua a God mena eia na komi
 puhi ke dika na?”

¹⁹ Gi ighamu kotida papara leghuagna nigna na vanohehe a God, saghoi soto na eiagna na komi fata ke toke moti lubatia na havimiu kori limagna a God eigna imanea ke vavuhaghamu me ei hahalia na hava ke velea keda eia.

5

Na Velepui Eidia Mara Kena Baubatu Kori Kiloau

¹ Ighamu koti baubatu kori kiloau, inau ku magnahaghinia kuda titiono vanighamu. Inau huju sina mane ku baubatu mu reghia kori matagu na papara ke eia a Krai. Mi nau ku adoa, kori vido a Krai keda tabiru mai, inau kuda mono duamiu koragna nigna na mana ke hutu vano. ² Inau ku magnahaghinighamu kotida reireghi toetokera na komi tinoni kiloau a God ke boa kori limamiu. Oti reireghira vaghagna na mane reireghi sip ke reireghi toetokera nigna na komi sip. Oti saghoi reireghira eigna koti toatogha arahai kena vahighamu kena hurughamu vamua. Teo. Oti sasaa na reireghiragna eigna a God ke magnahaghinighamu kotida eia. E boi toke gi kotida baubatu kori kiloau eigna ighamu koti magnahaghinia vamua na rongo. Saghoi eia vaghagna iangeni. Keana oti eia eigna koti pukuni magnahaghinia na hatheragna arahai koti reireghira. ³ Saghoi hurura arahai koti batura vaghagna ighamu koti vunaghidia, keana oti tateli vanira na puhimiu ke nabagna kedana leghua. ⁴ Mi kori vido a Krai, na vunaghidia mara kena reireghi sip keda tabiru mai, imanea keda heghamu na taba keda boi govu. Ighamu kotida mono hahali duagna koragna nigna na mana ke hutu vano.

⁵ Ighamu mara mathangani, inau ku magnahaghinighamu kotida leghua na haghoredia mara puhi. Ighamu gougovu koti vaututuni, oti mono taluleghu moti veihatheghi. Eigna na komi Rioriso ke Tabu kena velea,

“A God ke sokara pungusira arahai kena tautalu-

nagho,
keana imanea ke vatokera arahai kena
taluleghu.”

⁶ Oti sasaa na mono taluleghu saragna na mana ke hutu nigna a God. Gi kotida eia iangeni, imanea keda vahaihadighamu kori maghavu ke vahia. ⁷ Kori vido ke horuhaihadi na ghaghanamiu eigna sa fata, oti vaututunia a God keda hatheghamu eigna imanea ke toghaghamu me reireghighamu.

⁸ Oti reireghighamu ghehemiu tagna na koakoa moti mono kaikaliti hahali, eigna a Satan nimiu na thevuioka, imanea ke hiro hahalia na tinoni kiloau eigna keda diadikala nigna na vaututuni. Imanea ke vaghagna na laion ke nguru eigna ke magnahaghinia na vanga. ⁹ Oti sokara pungusia a Satan moti sokara ngasi kori nimiu na vaututuni eigna ighamu koti adoa na komi thagi papara ke padaghamu ke padara mua ara kulamiu kiloau kena mono ivei mi vei kori maramagna.

¹⁰ Ikeagaieni ighamu koti papara sina ghathi vido vamua, keana a God ke dothovighita hahali keda hatheghamu. Imanea keda vajinoa na havimiu, me vaheta nimiu na vaututuni, me heghamu na mana eigna kotida sokara ngasi hahali. A God ke kiloghamu eigna kotida totho itagna a Kraisi koragna nigna na mana ke hutu puala. ¹¹ A God keda vunaghi pungusira na komi fata gougovu ke hau me hau. Amen.

Na Vagovui Haghore

¹² A Sailas ke hatheu na risoagna na letasi kudo iaani. Imanea a kulada kori voututuni mu adoa imanea ke leghua a Krai hahali. Inau ku risoa atua na letasi iaani vanighamu bali vaheta nimiu na voututuni. Mu magnahaghinia kuda veleghamu na komi fata gougovu ku risoa kori letasi iaani ke tateli aua na puhi ke dothovighamu a God. Oti sokara ngasi kori nigna na dotho a God iangeni.

¹³ Na komi tinoni kena voututuni kena mono eeni i Rom, imarea kena vetula atua itamiu nidia na haghore dotho. A God ke vahira vaghagna vama imanea ke vahighamu. A Mak ke vaghagna a dathegu, imanea haju ke vetula atua mua nigna na haghore dotho. ¹⁴ Oti veikubaeghi* bali tateli aua nimiu na dotho. Inau ku tarai gi a God keda heghamu ighamu koti mono haidu toetoke duagna a Krai na soleana kori havimiu.

* **5:14** Kori haghore Grik “Oti veikisighi.” Na puhi kena eia mara i hau bali tateli aua nidia na dotho, imarea kena kisia na bakodia ara kuladia kiloua. Ikeagaieni, tadia sethe na meleha, na puhi kubae ke tughua na puhi kisi iangeni. Keana, tadia kekeha meleha imarea kena talu leghua na puhi kisi iangeni.

Na Rorongō Ke Toke Eigna a Jisas Kraiś
The New Testament in the Bughotu language of the
Solomon Islands
Niu Testament long langguis Bughotu

copyright © 2009 Wycliffe Bible Translators, Inc.

Language: Bughotu

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-13

PDF generated using Haiola and XeLaTeX on 11 Nov 2022 from source files dated 30 Nov 2021

ff048ce1-500f-52e4-9ba7-18fcd6abd5f1